

05 FEBRUARIE
RUGACIUNEA 1
SF. IERARH
TEODOSIE AL CERNIGOVULUI

Молитва первая

О, священная главо, крепкий наш молитвенниче и заступниче, святителю Феодосие, услыши нас с верою призывающих тя и усердно припадающих к иконе твоей. Поминай нас у престола Вседержителя и не престай молиться за ны. Вемы, яко грехи наши разлучают нас между нами и тобою, и недостойни есмы толикаго отца и ходатая. Но ты, быв подражатель человеколюбия Божия, не престани вопия о нас ко Господу, испроси предстательством твоим у всемилостивейшаго Бога нашего мир Церкви Его, на земли воинствующей, пастырем ея силу ревностно подвизатися о спасении людей, народу нашему милость Божию и долгоденствие. Умоли Небеснаго Отца всем нам подати дар, коемуждо благопотребен, веру истинную, надежду твердую и любовь неоскудевающую, градов наших утверждение, мира умирение, от глада и пагубы избавление, от нашествия иноплеменников

сохранение, юным и младенцем благое в вере
возрастание, старым и немощным утешение и
подкрепление, болящим исцеление, сиротам и
вдовицам милость и заступление, заблуждшим
исправление, бедствующим благовременную
помощь. Не посрами нас в уповании нашем,
споспешествуй, яко отец чадолюбивый, и нам
понести иго Христово во благодушии и
терпении, и всех управи в мире и покаянии
непостыдно скончати живот свой и Царствия
Божия наследники быти, идеже ты ныне
водворяешися со ангелы и всеми святыми,
прославляя Бога, в Троице славимаго, Отца и
Сына и Святаго Духа. Аминь.